

2TI - Tolysh Bible Shahlar

65001 - Unicode (UTF-8)

CAP Information: checked/corrected 2009 HAB

2 TİMOTÉY

*Pauli bə Timotey Duminə Nomə*

*2 Timotey*

PAULİ

## BƏ TİMOTÉY DIMİNƏ NOMƏ

VƏSƏ

Paul «*Bə Timotey Duminə Nomədə*» bəştə cıvonə həmkə Timoteyi vey məslohaton doydə. Durum əsosə movzuye. Paul Timoteyi dəvət kardeydə bo İsa Məsihi Şoyə Xəbə de bəfomandəti vəz kardeyro. Həməən əv bəy ilhom doydə ki, bə Şoyə Xəbə təlimi bəfomand bıbu. Həvari bəştə cıvonə həmkə tovsiyə kardeydə ki, bəştə kəşə zılləton, rast omə miğoviməton hiç qıləyni məhəl nınə, bə Şoyə Xəbə pevilo karde iyən bə miəlliməti xıdməti dəvom bıkə.

Paul xısusiyə məslohat doydə bə Timotey: «Nodonəti axməxə mıbohisonku diyəro bıbi. Tı zıneydəş ki, imon bə daveyon səbəb beydən» (2:23). Paul ıştə jimoni iyən məğsədi bəy nımunə nişo doydə. Əy bo imonin, mehıbbətin bey, təğıbonədə bə əzobon de səbri pətoveyro dəvət kardeydə.

### Kitobi məzmun:

1:1–2:13 Səlonon iyən nəsyəton

2:14–4:8 Məslohat iyən çəşnavi

4:9-22 Pauli xısusiyə xahişon iyən oxonə sıxanon

## 1

<sup>1</sup> De Xıdo rizo Məsih İsadə doə bıə jimoni vədi qorə çe Məsih İsa həvari vığandə bıə az Pauliku <sup>2</sup> səlonon bıbu bəçımı azizqıromiyə zoə Timotey! Pıə Xıdoku iyən çəmə Rəbb Məsih İsaku bəti lutf, mərhəmət iyən sulh bıbu!

### Bə Şoyə Xəbə bəfomand bey

<sup>3</sup> Az şəv-ruj hejo dıvo kardeədə tını bə yod vardeydəm, şukur kardeydəm ki, bənə ıştə dədə-bobo de təmizə vicdoni bə Xıdo xıdmət kardeydəm. <sup>4</sup> İştı çəşə arson bə yod vardeədə tını vindeyro həsrət kəşeydəm ki, çımı dil de şoyvo pur bıbu. <sup>5</sup> Bətikü bıə həğıgiyə imoni bə yod vardeydəm. Az əminim ki, sıftə ıştı nənə Lois iyən moə Evnikiədə bıə imon bətinədən heste. <sup>6</sup> Bı səbəb bəştı yod vardeydəm ki, az ıştə doston ıştı səpe noədəsə Xıdo bəti doə həmonə ənomi hejo pevoşını. <sup>7</sup> Oxo Xıdo bəmə tarsı rufi ne, gıvvə, mehıbbət iyən ağıl-kəmoli rufi doəşə. <sup>8</sup> Bıçımıro çəmə Rəbbi barədə

şoydəti kardeyku iyən Çəy roədə dustəğ bıə çımıku xəcolət məkəş. De Xıdo ğudrəti demı ivirədə Şoyə Xəbə roədə bə əzobi petov. <sup>9</sup> Xıdo bəçəmə əməlonro xılos nıkardışe əməni, bəştə məğsədi iyən lutfiro xılos kardışe iyən pok beyro sədo kardışe. Zəmon binonıbə bənav de Məsih İsa vositə ə lutf bəmə doəbe, <sup>10</sup> esət deçəmə Xıloskor Məsih İsa zuhuri oşko be. Əy ni kardışe marde, de Şoyə Xəbə vositə jimon iyən zoləjiyəti nişo kardışe bəmə. <sup>11</sup> \*Az bo ın Şoyə Xəbə vaiz, həvari iyən mıəllim təyin kardə bim. <sup>12</sup> In əzobon kəşe səbəbən ıme. Əmma xəcolət kəşeydənim çımıku, zıneydəm ki, Bəki imon vardəme iyən əminim ki, Əv ğadire bəmı doə əmonəti toşə Xıdo Hıkmı Ruji bo oqəte. <sup>13</sup> Məsih İsadə bıə de imoni iyən mehıbbəti çımıku məsə rostə təlimku nımunə peqət. <sup>14</sup> Bətı doə bıə çokə əmonəti bəmənadə jiyə de Mığəddəse Rufi vositə niğo bıkə.

<sup>15</sup> Zıneydəş ki, Asiyə viloyətədə bıəkəson həmməy dim qordınışone çımıku. Həmçinin Fiqel iyən Hermoqen çəvon arədəy. <sup>16</sup> Rəbb mərhəmət bıkə bə Onisifori kəy odəmon. Çumçıko çan kərə dılvandı doşe bəmı, çımı zincironku xəcolət nıkəşəşe. <sup>17</sup> Əv Romədə beədə de cəhdi nəvəy mını pəydo kardışe. <sup>18</sup> Bıdə Rəbb Hıkmı Ruji bo mərhəmət pəydo karde imkon bıdə bəy. Tı vey çok zıneydəş Efesədə əy bəmı çanə xıdmət kardışe.

## 2

### Məsihi roədə bə əzyəti petovən

<sup>1</sup> Tı isə, ha çımı zoə, de Məsih İsa doə lutfi ğoyım bıbi. <sup>2</sup> Çanə şoydon vədə çımıku məsə harçi bə bəfomandə odəmon həvolə bıkə, bıdə əvonən omutın bə co kəson. <sup>3</sup> Çe Məsih İsa çokə sərbozi ğəzinə demı ivirədə bə əzobi petov. <sup>4</sup> Sərbozəti kardəkəs de harujnə ğəyğuyon mışğol beydəni, əv dastroçə beydə ki, bəy əmr doəkəsi rozi bahaştı. <sup>5</sup> Həmçinin bə mısobiğə dəqıniyə idmonəkənən bə ğaydon mıvofiğ bəhs nıkon, bəçəvon sə zəfəri çambə nıbənon. <sup>6</sup> Jıqonə məhsuli iminə baxşə bə zəhmətkəşə kaştevoni rəsənine. <sup>7</sup> Dığğət bıkə bəçımı sıxanon. Bəçımı votəyon həmməy sərəseyro Rəbb bətı koməqəti bəkardə.

<sup>8</sup> Yodo beməkə çımı vəz kardə bə Şoyə Xəbə mıvofiğ, Davudi nəsılo bıə çe mardon dılədə bəyji bıə İsa Məsihi. <sup>9</sup> In Şoyə Xəbə roədə zincirbədast bıəm, bənə qıləy cinoyətkori bə əzobi petoveydəm. Əmma bə Xıdo kəlomi zincir jə bıəni. <sup>10</sup> Bı səbəb az bə har çiy tov vardeydəm bə səçın kardəbıəyon xatır, bıdə əvonən Məsih İsadə bıə bə xılosi de zolə izzəti noil bıbun. <sup>11</sup> Etıboynə sıxane ım,

«Qirəm Deəy mardimonbo,

Deəyən bəjıyemon;

<sup>12</sup> Qirəm petovomon,

Deəy ivirədə podşoəti bəkardemon.

Ehanə Əy bə həşə bıjənomon,

Əvən əməni bə həşə bəjəne.

---

\*1:11 1Tim.2:7

<sup>13</sup> Əmə bəfomand nıbomonən,  
Əv bəfomand bəbe.  
Çumçiko Əv Bəştə İştəni zidd nıbəşe».

### Dəvinəo beşə koəkə

<sup>14</sup> İmoni bə imoniyon yod dənə. Xıdo huzurədə çəvonku tələb bıəkə ki, sıxanon mənəo barədə mıbohisə karde oroxnın. Im bə quş doəkəson foydə əvəni, zərər bəje. <sup>15</sup> Cəhd bıəkə Xıdo nəzədə dəvinəo beşə, benoxsan, həğiğəti kəlomi səröst omutə qıləy koəkə bıbi. <sup>16</sup> Dınyoviyə puçə qəponku diyəro bımand. Oxo dımon mışğol bıəkəson həniyən beimon bedən. <sup>17</sup> Çəvon sıxan xorə gəzinə ebətəne. Himeney iyən Filit çəvonədəy. <sup>18</sup> Əvon həğiğətiku dəqijiyeydən, voteydən ki, bəyji bey həni bıə, de jıqoy co kəsonən imono gəndeydən. <sup>19</sup> İntasi çe Xıdo ekardə bıncə gəym mandə, de ın sıxanon mıhi jə bıə: «Rəbb zıneydə İştə odəmon» iyən «Rəbbi nomi kəşə har kəs nohəxətiyonku diyəro bışu».

<sup>20</sup> Qıləy yolə kədə əncəx gızılə iyən nıgə gəbon ne, həmçinin taxtə iyən qılıyə gəbonən hestin. Çəvon kali qılən bo təmizə koy, kali qılənən bo notəmizə koy oko doə beydən. <sup>21</sup> De jıqoy harki ıştəni notəmizə koonku oqəto, əv bo təmizə koy mıvofiğ zınə bəbe, təğdis kardə bəbe, boştə Soybi foydəyn bəbe, bo har çəkə koy hozı kardə bəbe.

<sup>22</sup> Cıvonəti ehtirosonku diyəro bıbi. De sofə dili bə Rəbbi ovardəkəson ivirədə çe salehəti, imoni, mehibbəti iyən sulhi dumo eqın. <sup>23</sup> Nodonəti axməxə mıbohisonku diyəro bıbi. Tı zıneydəş ki, ımon bə daveyon səbəb beydən. <sup>24</sup> Rəbbi gıl davekor bıəninniy. Bərəks, de həmməy tıvox bıənin, bo omute gəbil, hovsələyn bıənine. <sup>25</sup> De həliməti tərbiyə kardənine vəynə beşəkəson. Bəlkəm Xıdo bəvon tobəro imkon bıdə, əvonən bə həğiğəti sərəsın. <sup>26</sup> Bəvədə əvon səzukin bey bəzinen iyən deyəvon ıştə piyəy kardə, əvoni əsir kardə iblisi tələku pebərəxen.

## 3

### Oxonzəmonədə

<sup>1</sup> İmi bızın ki, bı oxonzəmonədə çətinə dovrən bəben. <sup>2</sup> İnsonon xudbin, pulpərəst, təkəbburin, məğrur, təhğirəkə, bəştə pıə-moə itoət nıəkə, nunku, pokətiku məhrum, <sup>3</sup> beşəfğət, bədtıvox, bıhtonəvot, bə nəfsi hakim be nıznə, berəhm, çokiəti deşmen, <sup>4</sup> xain, beehtiyot, gıddəyn, vey bəpiyəşone kefciləti Xıdosən. <sup>5</sup> Zahirən bənə momini bəçiyen, əmma dılətono çəy molyəti bə həşə bəjen. Diyəro bımand jıqo odəmonku. <sup>6</sup> Çımon arədə jıqo odəmon hestin ki bə kəon dəfırsiyeydən iyən hərcoyə jenon royku bekardeydən. Jıqo jenon qıno veye iyən ıştə ehtiroson dumo şıkırıyeydən, <sup>7</sup> hejo bo tojə təlimon nəveydən, əmma hiç vaxti bə həğiğəti sərəse zıneydənin. <sup>8</sup> \*Yannis iyən Yambris bə Musa çəkənə zidd şın, ım odəmonən jəqo bə həğiğəti zidd şeydən. Əvon gəlpə imonsoyb, bə beəxloğə şınemoni soyb bıə odəmonin. <sup>9</sup> Əmma həni çəvon ko

nıbəqəte. Çoknə həməkəsi vindişe çe Yannis iyən Yambrisi axməxəti, çımon axməxətiyən həməkəs oşko bəvinde.

### **Bə Timotey oxonə nəsyəton**

<sup>10</sup>\*Tı esə boy çımı təlimi, rəftori, məğsədi, imoni, səbri, mehıbbəti, durumi dumo eqınış, <sup>11</sup> Antakyədə, Konyədə, Listredə bəçımı sə omə təğıbon iyən kəşə əzobonı vınde. Az petovem bə çı curə təğıbon! Əmma Rəbbi xılos kardışe mını çımon həmməyku. <sup>12</sup> De Məsıh İsa momınə jımon kardəkəson həmməy bə təğıbi məruz bəmanden. <sup>13</sup> Əmma bevəcə odəmon iyən hiləqoron şe-şe həniyən betər bəben, ıştəniyən iyən co kəsonən bə dast dəbəğanden. <sup>14</sup> Tı esə boy bəfomand bıbi iyən ğoym bımand ıştə omutə iyən peştıpur bıəyonədə. Çumçıko zıneydəş çikıku omutə imon, <sup>15</sup> Mığəddəsə Nıvıştəyon əğılətiku zıneydəş. Əvon bə Məsıh İsa bıə imoni vosıtə xılos vardə hıkməti bəti bo omute ğadirin. <sup>16</sup> Mığəddəsə Nıvıştəyon həmməy Xıdoku ilhom səşone iyən təlim, mızəmmət, islo, salehətiro koməqəti kardeydən ki, <sup>17</sup> jıqonə Xıdo xıdmətəvon hartərəfə təchiz kardə bıbu iyən bo har çokə koyro hozı bıbu.

## **4**

<sup>1</sup> Xıdo iyən bəyjiyon de mardon mıhokımə kardə Məsıh İsa navədə Çəy zuhuri iyən Podşoəti xatır bəti hamyeydəm ki, <sup>2</sup> Xıdo kəłomi vəz bıkəy, har vaxtı bə insonon de səbri təlim omuteyro, mızəmmət kardeyro, ğədəğən noyro iyən dılvandı doyro hozı bıbi. <sup>3</sup> Oxo jəqo qıləy vaxt bome ki, odəmon bə rostə təlimi penıbətoven. Bəştə piyəyon mıvofiğ bə quşı xoş omə sıxanon votə mıəllimon qırdə bəkan ıştə qırdə. <sup>4</sup> ıştə quşon bəqəten ki, həğığəti nıməsın, bə əfsonon meyl nişo bədon. <sup>5</sup> Əmma tı har çiy barədə səzukin bıbi. Bə əzobi petov, Şoyə Xəbə pevılo bıkə, ıştə xıdməti qırd icro bıkə.

<sup>6</sup> Çımı xun həni peşomə təğdimi ğəzinə rubeyədəy, marde vaxtım rəsə. Çımı umr kam mandə. <sup>7</sup> Çokə mıborizə bardıme, ıştə roy bə sə jəme, ıştə imoni niğo dome. <sup>8</sup> Esə bomı salehəti çambə hozıye. İnsəfinə Hakim bıə Rəbb Hıkmı Ruji əy bəmı – əncəx bəmı ne, Bəçəy zuhuri orzuvoni bardəkəson həmməy bədo.

### **Xısusiyə xahişon iyən səłomon**

<sup>9</sup> Həkəməti bıkə rəyrə boy çımı tonə. <sup>10</sup>\*Oxo Dima maddiyə dınyo piyeyro mını tərq kardışe bə Salonik şe. Kreskent bə Qalatiyə, Tit isə bə Dalmatiyə şe. <sup>11</sup>\*Əncəx Lukə çımı paliyoy. Markiyən peqət biyə dəştə, əv xıdmətədə bəmı koməqəti kardeydə. <sup>12</sup>\*Tixiki isə vığandıme bə Efes. <sup>13</sup>\*Keynə boş, Troasədə Karpi tonə çımı noə əbo, kitobon, xısusən, nıvıştə bıə perqamentonən biyə bomı.

---

\***3:10-11** Həv.13:14–14:20

\***4:10** 2Kor.8:23; Qal.2:3; Kol.4:14; Tit 1:4; Flm.23-24

\***4:11** Həv.12:12,25; 15:37-39; Kol.4:10,14; Flm.23-24

\***4:12** Həv.20:4; Ef.6:21-22; Kol.4:7-8

\***4:13** Həv.20:6

<sup>14</sup>\* Mısqər İskəndəri vey bevəci kardışe bəmi. Rəbb çəy əməlon əvəzi bədo bəy.

<sup>15</sup> Tınən ıstəni çəyku çəş bıkə, əv de şiddəti bəçəmə votəyon zidd beşe.

<sup>16</sup> İminə kərə az məhkəmədə ıstəni mıdofıə kardeədə hiçki çımı tərəfi benışe, həmməy tərq kardışone mını. Bıdə qıno hisob nıbu bəvon. <sup>17</sup> Əmma Rəbb bəçımı koməq oməy ğırvəyn kardışe mını ki, vəz deçımı vositə qırdıçıp bəyon kardə bıbu iyən milləton həmməy bıməsın əy. Az şiri qəvo rəxəym. <sup>18</sup> Rəbb mını har curə bevəcə koyku pebəroxne iyən Boştə Osmoni Podşoəti xılos bəka. Zoləti izzət bıbu Bəy! Amin.

<sup>19</sup>\* Çımı səlomi bırosın bə Priskilə, Akilə iyən Onisifori kəy odəmon həmməy.

<sup>20</sup>\* Erast mande Korinfədə. Trofim isə noxəşbe, əve Miletədə oqətımə əv. <sup>21</sup> Cəhd bıbə zımıston nıbə boy. Bətı səlom vığandeydən Evvul, Pudent, Lin, Klavdiyə iyən imoniyon həmməy.

<sup>22</sup> Rəbb detı bıbu! Lutf bıbu bəşmə!

---

\* **4:14** Zəb.62:12; Rom.2:6; 1Tim.1:20

\* **4:19** Həv.18:2-3; 2Tim.1:16-17

\* **4:20** Həv.19:22; 20:4; 21:29; Rom.16:23-24